

# VERS POVR LE

## BALLET DV LENDEMAIN

de la Nopce de Ian, & de la  
grosse Iane.

---

### PREMIERE ENTREE, Le Chariuary.

**L** A grosse Iane, & son espoux,  
Quand nous nous mocquons d'eux, se moquent bien de nous:  
Nos grils, nos chauderons, nos poisses nos pincettes,  
Nos leschefrites, & nos plats,  
Loin de les refroidir, leurs seruent de trompettes  
Pour les animer aux combats.

Bien que le reste de la nuit  
Chacun de nous tempeste & congne,  
La nouvelle espousée avecque moins de bruit  
Fera beaucoup plus de besongne.

---

### SECONDE ENTREE.

Dansée par le Marié, qui met en fuitte le Chariuary  
avec sa halebarde.

Au bruit trop importun de ce Chariuary,  
Qui me transporte de colere,  
Bien loin de m'aquerir la qualité de pere  
Je perds celle d'amant & celle de mary:

Mais pour mieux trauailler à treuuer mon repos  
Je viens avec ma hallebarde,

*Attaquer ces coquins, les mettre hors de garde,  
Les perfer d'outre en outre, ou leur rompre les os.*

*Ce prompt Chariuary, tout autre que le leur,  
Pousse en fuitte cette canaille,  
Me fait rester vainqueur dans le champ de bataille,  
Me met en assurance & les comble de peur.*

**TROISIÈME ENTREE,**  
Danſée par vn Viollon & deux Vallets de Feſte qui  
portent le broüet.

*Si ce friand broüet auoit pû vous tenter  
Belles, avec nous venez le meriter:  
Après les grands exploicts de nos amours extremes,  
Si vous voulez dès aujourd'huy  
Bien qu'il ſoit dreſſé pour autrui  
Nous le garderons pour nous meſmes.*

**QUATRIÈME ENTREE.**  
Danſée par la Rectoree & la Graillon qui ſortent  
yures de la Nopce, & ſe battent, la  
Mariée les ſepare.

**LA RECTOREE.**

*Quoy me venir heurter pour me ietter par terre,  
C'eſt bien m'affronter de tout point:  
Tu m'as en deſ-jeunant vaincûe à coups de verre,  
Mais ie veux ſur le champ te vaincre à coups de poing.*

**LA GRAILLON.**

*Vous faiſtes du Recteur, Madame Rectoree  
Quoy vous attaquez à Graillon,  
Ie vay bien eſpouſter voſtre chien de haillon,  
Vous eſtes moins de vin que d'orgueil enyurée.*

**I A N E.**

*Mon eſprit en repos ne peut eſtre remis,  
Pourquoy ſe quereller touſiours deuant ma porte?*



3

Ainsi donc mes amis me traittent de la sorte  
Que font mes plus grands ennemis:  
Quoy du bruit tout le soir, la nuit & le matin,  
Venex dans la maison nous en dire les causes:  
Ce combat nous deuroit predire bien des choses,  
Car ie pense qu'il est de vin.

---

CINQUIESME ENTREE,  
Dansee par Iodelet Sauetier, qui porte le soulier de la  
Mariée, où il auoit mis vn bout.

Ie vous apporte vn bout de bon cuir de leuant,  
Mon ouvrage bien faict surpasse vostre attente:  
Sus donc contentez moy comme ie vous contente,  
Mais ne m'en donner rien c'est me payer de vent:  
Soit, plus vous paroissiez à mon endroit ingratte  
De generosité d'autant plus ie me flatte,  
Ainsi loing d'aspirer à vostre moindre bien  
Auec ce bout que i'ay faict vostre,  
Ie vous en offre encore vn autre,  
Et si ie n'en demande rien.

---

SIXIESME ENTREE.  
Dansee par l'Egueulé & la Fleur, qui sortent yures en se  
battant, & sont separez par Iodelet avec  
son tire pied.

L E G V E V L E.

I'ay du courage assez, mais le vin que i'ay pris  
M'empesche de rester ferme comme vne roche,  
Et dedans ce combat pour sa gloire entrepris,  
Il me faict reculer quand il faut que i'approche.

L A F L E V R.

Ie m'en vay t'espouster & des mieux sur ma foy.  
La terre tourne ce me semble!  
Non sans doute c'est qu'elle tremble  
Mais plustost pour toy que pour moy.

## SEPTIESME ENTRE'E.

Danſée par Iane, qui teſmoigne par ſes pas & par ſes  
geſtes qu'elle ſe veut démarier.

*Quoy qu'on en parle & qu'on en crie  
Je veux que l'on me demarie,  
Je ne prefere rien à mon contentement  
Si noſtre mariage eſt à mes vœux contraire,  
Si le principal nœud en eſt encore à faire,  
Ne le pourra-t'on pas dénouer aiſément?*

M A R I O N.

*Ian ceſſant d'eſtre à luy pour eſtre du tout voſtre  
Fui ſans doute immobile entre vos bras réduit,  
S'il a faiët vn four cette nuit  
C'eſt pour mieux enfourner à l'autre.*

M A G D E L O N.

*Il n'eſt pas encor temps de vous deconforter  
Voſtre Eſpoux eſt fort beau, ieune & de belle taille,  
Iane, le feutrop prompt n'eſt rien qu'un feu de paille:  
On recule ſouuent: mais c'eſt pour mieux ſauter.*

## HVICTIESME ET DERNIERE ENTRE'E.

Ou Leguculé, la Fleur, Nanon, & Magdelon dancent  
vn branle de ſortie avec les Mariez.

*Dançons, rions, courons au verre  
Les nouveaux mariez ſont d'accord pour iamais,  
Et les douceurs de cette paix  
Preſagent vne douce guerre.*

L E M A R I E.

*Amis, c'eſt trop dancer Iane en a mal au ventre,  
Seul avec elle laiſſez moy,  
Chacun donc s'en aille chez ſoy,  
Viſtes ſortez, afin que l'en tre.*

F I N.